

敬

由

編

敬由編卷之六

唐

張九齡累歷刑獄之司無所不察每有公事赴本司
行勘胥吏輩未敢訊効先取則於九齡因於前面
分曲直口撰案卷囚無輕重咸樂其罪時人謂之
張公口案

魏州長史敬讓暉之子也有周利貞者武后酷吏復
起時朝集讓以父冤越次而奏曰周利貞希姦臣
意枉殺先臣暉惟陛下正罰以謝天下左臺侍御

史崔璋劾讓不待監引請行法玄宗曰訴父之枉
不可不矜也朝廷之儀不可不肅也奪讓俸三月
復貶利貞邕州長史未幾賜死梧州

盧奐累任大郡皆顯治聲所至之處畏如神明有無
良必行嚴斷仍以所犯之罪刻石立本人門首再
犯處於極刑民懼絕無犯法者明皇知其能官賜
中金伍千兩璽詔褒諭曰專城之重分陝之雄仁
惟惠愛性實謙冲亦旣利物存乎匪躬斯爲國寶
不墜家風尋除兵部侍郎陝州之民多有淫祠者
州之士民相語曰不須齋禱明不必求巫祝爾莫

犯盧公立便見禍福

顏真卿遷監察御史使河隴時五原有冤獄久不決
天且旱真卿辯獄而雨郡人呼御史雨

長安城中有豪民楊崇義者妻劉氏通隣舍兄李弁
一日乘崇義醉歸寢室害之埋於枯井時僕妾輩
莫覺也惟鸚鵡在堂架上其日氏詭令童僕大索
陳府縣捕拷無辜凡數百人不得再詣崇義家檢
校鸚鵡起架上聲屈縣官驚問故鸚鵡曰殺家主
是劉氏李弁也遂縛氏捕弁下獄備招情款處死
府尹奏聞明皇嘆訝封鸚鵡爲綠衣使者付後宮

張說作傳好事者傳之

李杲遷洛陽令嚴刑峻法民吏畏服積弊盡革政以
清簡時有進士劉兼赴舉上都舍村邸至夜聞街
衢中有數人相語曰李令今古正人也吾輩見其
行事令人破膽此中不可久居宜遷他邑以求血
食兼訝其事遂啓門視之寂無影響其邑之妖神
乎兼遂書贊於邸壁云狡吏畏威縣妖破膽好錄
政聲聞於御覽後明皇旌其能賜金百兩及章服
焉

監察御史蔣挺有所犯勅朝堂杖之黃門侍郎張廷

珪曰御史憲司清望耳目之官有犯當殺卽殺當流則流不可決杖可殺不可辱也

廣州都督裴旻先徵下獄議罪相張嘉貞請杖之張說曰刑不上大夫爲其近君且養廉耻也臣曷巡北邊聞姜皎杖朝堂深惜之今往不可悔豈可復蹈前失乎嘉貞有後言說曰宰相時來則爲之若大臣皆可笞辱行及吾輩矣此言非爲旻先爲天下士大夫後嘉貞坐受賄遷大因始服其言

元德秀字紫芝署魯山令治專用德化耻爲刑辟有盜繫獄虎爲暴請格虎自贖許之吏白彼自詭得

亡去不可聽德秀曰許之矣吾不食言卽有累吾
當坐不以及也明日盜戶虎而還三年魯山大穰
民服其德玄宗在東都命三百里內州刺史縣令
各以聲樂集都下爲歡時河內太守輦優伎數百
袂錦繡作犀象戲瓊光麗德秀惟遣樂工數十
人聯袂歌于薦于于薦于者德秀所爲歌也帝聞
而異之太息曰賢人之言謂宰相曰河內民其塗
炭乎乃出河內守而獎德秀德秀居官所得俸悉
以衣食人之孤遺者歲滿惟一縑駕紫車而去愛
陸渾佳山水定居焉不爲墻垣扃鑰家無僕妾

饑或日不爨彈琴讀書爲樂而已德秀冲遂純明
不言而信房琯每見之輒嘆曰見紫芝眉宇使人
名利之心都盡天下高其行不名謂之元魯山齊
澣初及進士第以拔萃調蒲州司法叅軍有父子
連坐論死者澣曰條落則本枯奈何令俱死議貸
其父太子不聽固爭得原開元初姚崇復相用爲
給事中中書舍人論駁及詔詔皆援準古誼朝廷
大政必咨之時號解事舍人

崔隱甫遷洛陽令梨園弟子胡鵠善笛有寵嘗負罪
匿禁中帝以他事召隱甫從容指曰就卿丐此人

對曰陛下輕臣而重樂工請解官再拜出帝遽謝
與胡雛隱甫殺之有詔貰死不及矣賜隱甫百緡
累官刑部尚書封清河郡公玄宗欲相之曰可見
牛仙客不奉詔隱甫潔介自守明吏治在職以彊
正稱

韓休爲相萬年尉李美玉有罪帝將放嶺南休曰尉
小官犯非大惡今朝廷有大姦請得先治金吾大
將軍程伯獻恃恩而貪室宅輿馬僭法度臣請先
伯獻後美玉帝不許休固爭曰罪細且不容巨猾
乃置不問陛下不出伯獻臣不敢奉詔帝不能奪

大率堅正類此初嵩以休柔易故薦之休臨事或折正嵩嵩不能平宋璟聞之曰不意休能爾仁者之勇乎

玄宗嘗賜酺三日上御五鳳樓觀者喧溢樂不得奏金吾白挺如雨不能遏止上患之高力士奏河南丞嚴安之爲理嚴爲人所畏請使止之上從之安之至以手板繞場畫地曰犯此者死於是三日指其畫以相戒無敢犯者

李福尚書鎮南梁境內多有朝士庄庶子孫僑寓其間而不肖者相效爲非前牧以其各有階緣弗克

禁止閭巷苦之福嚴明有斷處分寬織茂籠召其
尤者詰其家世譜第在朝姻親乃曰郎君籍如是
地望作如此行止無乃辱於存亡乎今日所懲賢
親眷聞之必賞老夫遽命盛以竹籠沉於漢江由
是其儕惕息各務戢歛崔氏二男荊州三害不免
行刑也

李至爲中書舍人將軍王去榮以私怨賊殺其邑令
當死帝以其善用礮石欲原之至爭之曰去榮爲
逆漸不可長陛下以其一能而免之諸軍中伎藝
絕倫者何限令人各恃其能而犯上將何以禁之

若止捨去榮而誅其餘是法令不一而誘人於罪也若盡捨之將難乎其爲上杆罔者必衆必痛誅而後已是惜一去榮之材不殺而殺十數如去榮之材者也所傷滋多且律殺縣令罪列十惡以爲逆也世未有逆於此而順於彼亂於富平而治於陝郡悖於縣君而忠於大君者惟陛下裁恩下其議太子太師韋見素等議以爲法者天地之大典雖在帝王猶不敢動用非法況於小人得擅殺自恣乎陛下爲天下主義無頗愛而寬之將法不行人道屈矣夫國以法理軍以威勝有恩無威慈母

不能畜其子惟裁恩帝竟貸之

李栖筠幼孤有遠度莊重寡言笑好書多通慎交游
隱居汲共城山舉進士高第調冠氏主簿太守李
峴與爲布衣交遷安西節度府判官肅宗起靈武
糾精卒七千赴國難擢殿中侍御史時太守峴已
遷御史大夫矣有詔峴及三司按羣臣從賊者峴
表栖筠爲詳理判官栖筠悉心助峴論情罪必原
其人所以被汗辱者狀劄輕重爲六等以定罪詳
慎愛恕峴聲譽出一時同官上以得相遷吏員外
郎累官御史大夫時元載方用事會月蝕帝召問

栖筠日月蝕修刑今罔上行私者未得豈天意有
做耶

李峴吳王恪孫也乾元初以中書侍郎同中書門下
平章事位望最舊事多獨決李輔國呂諲稍不平
鳳翔七馬坊押官盜掠人夫興冬謝夷甫殺之輔
國諷其妻使訴枉詔監察御史孫鑒鞠之直夷甫
其妻又訴詔御史中丞崔伯陽刑部侍郎李曄大
理卿權獻爲三司訊無異辭妻不承輔國助之乃
令侍御史毛若虛覆按若虛妾罪夷甫言御史用
法不端伯陽怒欲質讓若虛馳入自歸帝帝留若

虛簾中頃伯陽等至劾若虛傳中人失有罪帝怒叱之貶伯陽高要尉權獻杜陽尉逐李曄嶺南流瑩播州峴謂責太重入言於帝曰若虛希旨用刑亂國法陛下信爲重輕是無御史臺矣帝怒乃出峴爲蜀州刺史代宗立改荆南節度入改禮部尚書初東京平陳希烈等數百人待罪議者將悉抵死帝意亦欲懲天下故崔器等附致深文峴時爲三司獨曰法有首有從情有重有輕若一切論死非陛下與天下維新意且羯胡亂常誰不凌汙衣冠奔忙各顧其生可盡責邪陛下之親戚勳舊子

若孫一日皆血鉄砧上爲仁恕哉書稱殲厥渠魁
脅從罔治况河北殘孽劫服官吏其人尚多今不
開自新之路而盡誅之是堅叛者心使爲賊致死
困獸猶鬪况數萬人乎崔器與呂諲皆覲覲文吏
操常議不及大體固爭數日乃見聽衣冠蒙更生
賊亦不能使人歸怨天子峴力也

李勉字玄卿鄭惠王元懿曾孫勉幼勤經史長沈雅
清整從肅宗靈武以監察御史劾大將背闕坐帝
太息以爲朝廷始尊者也遷司善員外郎時關東
獻俘百人將卽死有太息者勉過問之對曰被脅

耳非反也立馳入見曰今元惡未殄遭點汙者半天下盡殺之是驅天下資兇逆也使其中欲澡心自歸而無繇矣宜招徠懷之帝曰善立馳騎宥釋於是自拔歸者踵至累梁州都督山南西道觀察使前密縣尉王晬以勤幹聞攝南鄭令爲權幸所誣構處死勉太息曰上方藉宰牧爲民父母奈何以讒構殺良吏乎卽留晬爲請得免而勉入爲太常少卿晬後以推擇爲吏有能名天子欲柄用勉李輔國恚勉不下已出郾號州刺史久之觀察江西時賊寇陷州縣將吏內叛勉僇力平定之部人

有繫獄以木偶署勉名埋之爲厭勝驗治服勉曰
是爲其父故孝也縱不誅入爲京兆尹兼御史大
夫魚朝恩領國子監權寵震赫前尹黎幹諂事之
伺入監每勅吏治數百人具以餉勉至吏以請執
不可朝恩銜之出節度嶺南功名赫然後召歸至
石門盡搜家人所蓄犀珍投之江中時人謂可繼
宋璟盧奐李朝隱部人叩闕請立碑頌德

裴諝絳州聞喜人爲金吾右將軍建中初以山陵近
禁屠殺汾陽王子儀隸犯禁諝列狀奏劾或謂之
曰郭公有社稷功奏糾隸固當獨不爲郭公地耶

譖曰此乃所以爲之地也郭公權重震主矣天子
新卽位必且謂羣臣咸黨附阿之吾欲發其細過
示公權重不足畏也上尊主威下安大臣不亦可
乎有詔三司決庶獄未允聽撾登聞鼓譖進曰古
諫鼓謗木之設所以達幽枉延直言今輕猾爭纖
介上聞此謂庶獄古明王罔攸兼者也今兼之不
難其爲吏乎譖惡法吏舞文或挾宿爲重輕因獻
獄官箴以諷有司久之累兵侍郎河南尹譖自以
五世尹河南入視事不敢當正處而坐不鞠賊罪
以寬和爲理

吳湊章敬皇后弟也進累左金吾衛大將軍元載請
於是王縉楊炎王昂韓會包佶等皆當坐湊建言
法有首從從不應死一用極刑虧德傷仁縉等繇
是得減死已乃爲京兆尹初府中易湊貴戚子不
便簿領每有疑獄待其將出則遮湊取決幸倉卒
得容欺湊叩鞍一視凡指擿盡中其弊初無留思
衆畏服不意湊精裁遣如此僚吏非大過不榜責
召至廷詰服原去其下傳相訓勗舉無稽事

張鑑字季權父其休朔方節度使東都留守鑑以蔭
授左衛兵曹叅軍郭子儀表爲元帥府判官累遷

殿中侍御史乾元初華元令盧樅以公事譙責邑人齊令詵令詵宦人也銜之構樅罪鎰按驗當免官有司承風以死論鎰不直之乃白其母曰今理樅樅免死而鎰坐貶嘿則負官貶則爲太夫人憂敢問所安母曰兒無累於道吾所安也遂執正其罪樅得流鎰貶撫州司戶叅軍徙晉陵令江西觀察使建中二年拜中書侍郎同中書門下平章事郭子儀婿太僕卿趙縱爲奴告下御史劾治而奴留內侍省鎰奏言貞觀時有奴告其主謀反者太宗謂謀反理不獨成尚當有他人論之豈藉奴告

耶乃著令奴告主者斬由是賤不得干貴下不得
凌上教本旣修悖亂不萌頃者長安令李濟以奴
得罪萬年令霍晏因婢坐譴輿臺下類主反畏之
悖慢成風漸不可長建中元年詔書奴婢告主非
謀反者同自首法並準律論由是獄訴衰息今縱
事非叛逆而奴留禁中獨下縱獄情所不協且將
帥功孰大於子儀冢土億乾兩婿前已得罪縱復
繼之不數月斥其三婿假令縱實犯法事不緣奴
尚宜錄勲念亡以從蕩宥况爲奴所懇耶陛下方
貴武臣以討賊彼雖見寵一時不能忘懷於異日

也帝納之貶縱循州司馬杖奴死鑑召子儀家僮數暴示奴尸盧杞忌鑑剛直欲去之時朱泚以盧龍卒戍鳳翔帝擇人以代杞卽謬曰鳳翔將校班秩素高非宰相信臣不可鎮撫臣宜行帝不許杞復曰陛下必以臣容貌最陋不爲三軍所信恐後生變臣不敢自謀惟陛下擇之帝乃顧鑑曰文武兼資望重內外無易卿者其爲朕撫盧龍士乃以中書侍郎爲鳳翔隴右節度使

盧羣貞元六年入拜侍御史有人誣告故尚父子儀嬖人張氏宅中有寶玉者張氏兄弟又與尚父家

子孫相告訴詔捉按其獄羣奏曰張氏以子儀在
時分財子弟不合爭奪然張氏宅與子儀親仁宅
皆子儀家事子儀有大勲伏望特赦勿問俾私自
引退德宗從其言時人嘉其識大體焉

奚陟轉刑部侍郎時主計臣延齡以險刻貴幸而與
京兆尹相惡以危事中之尹坐譴已又逮繫其吏
峻繩之事下司寇主奏議者欲文致而甘心焉公
侃然持平挫彼嶽嶽君子聞之善其知道不私刑
曹旣清以餘力兼領選事居一年後權知吏部侍
郎又一年卽真是秩言能官者本朝有裴馬盧李

四君子物論以公婉焉時疾發癰有國醫方直禁中上促遣如第且飾之曰某賢臣也悉術以治之袁滋初在李勉幕府鳳翔有耕夫得馬蹄金一甕送縣爲令者盧公藏主守不慎而寘之私室翌日開視之則皆土塊耳以狀聞府遣掾按之不能自明誣服換金初云藏之糞壤被人竊去後云投之水缸中失其所在雖未窮易用之所皆以爲換金無疑矣府中宴集語及此事咸共嗟嘆惟滋獨疑其枉勉乃移獄就府俾滋鞠之滋閱甕間得二百五十餘塊詰其初獲者則二人以巨竹舁至縣乃於剏

肆索金依塊形狀鎔寫校量始秤其半已及三百斤計其大數非二人以竹檐可舉卽是在路之時金已化爲土矣令乃獲雪御史中丞韋貞伯聞之表爲侍御史刑部大理覈罪人不平憚滋守法因權勢以請滋終不署奏遷工部員外郎韋臯始招來西南夷德宗選郎吏可撫循者皆憚行至滋不辟帝嘉之擢禮部郎中兼御史中丞賜金紫持節往踰年還遷爲華州刺史政清簡流民至者給地居之名其里曰義合專以慈惠爲本未嘗設條教民愛向之有犯令時時法外縱舍得盜賊或哀其

窮出財爲償所亡召爲左金吾衛大將軍以楊於陵代之滋行者民遮道不得去於陵使諭曰吾不敢易袁公政人皆羅拜乃得去莫不流涕

柳渾字夷曠梁僕射惔六世孫也初江西魏少游表爲判官州僧有夜飲火其廬者歸罪瘖奴軍候受財不詰獄具渾與其寮崔祐甫白奴冤少游趣訊僧僧首伏因厚謝二人累官同中書門下平章事仍判門下省帝嘗親擇吏宰畿邑而政有狀召宰相語皆賀帝得人渾獨不賀曰此特京兆尹職耳陛下當擇臣輩以輔聖德臣當選京兆尹承大化

尹當求令長親細事代尹擇令非陛下所宜帝然之玉工爲帝作帶誤毀一銙工不敢聞私市他玉足之及獻帝識不類撻之工人伏罪帝怒其欺詔京兆府論死渾曰陛下遽殺之則已若委有司須詳讞乃可於法誤傷乘輿器服罪當杖請論如律由是工不死左丞田季羔從子伯彊請賣私第募兵助討吐蕃渾曰季羔先朝號名臣由祖以來世孝謹表闕於門隨時舊第惟田一族耳討賊自有國計豈容不肖子毀門構微一時幸損風教哉請薄責以示懲沮帝嘉納韓滉自浙西入相省中榜

吏渾曰省闥非刑人之地而榜吏至死公家先相國以狷察不滿歲輒罷今公奈何蹈前非顓立威福豈尊主卑臣義耶渾爲褫威曰志貞除浙西觀察使渾奏志貞與小吏縱嘉其才不當超劇職臣以死守不敢奉詔會渾移疾出卽日詔付外施行疾間因乞骸骨不許門下吏白過官渾愀然曰旣委有司而復撓之豈賢者用心邪士或千里辭家以干祿小邑主辦豈慮不能是歲擬官無退異者子華質行剛方爲昭應令檢校工部郎中修官使設棘圍於市狗邑中白民不得華清宮瓦口材用

投圖中踰三日不選者死不終日已山積矣管辦
畧足宰相元載有別墅以奴主務自稱郎將怙勢
縱暴租賦未嘗入官子華因奴入謁收付獄列發
宿罪杖殺之一邑震伏載不敢怨遣吏厚謝

柳公綽字子寬京兆華原人始生三日伯父子華曰
興吾門者此兒也因小字起之幼孝友性質嚴重
起居皆有禮法屬文典正不讀非聖書舉賢良方
正直言極諫補校書郎間一年再登其科累遷京
兆尹方赴府有神策校乘馬不避者卽時榜死帝
怒其專殺公綽曰此非獨試臣乃輕陛下法帝曰

既死不以聞可乎公綽曰臣不當奏在市死職金
吾在坊死職左右巡使帝乃解長慶初幽鎮用兵
補置諸將使驛供道公綽奏曰比館遽匱乏驛置
多闕勅使衣緋紫者所乘至三四十騎黃綠者不
下十數騎吏不得視券隨口輒供驛馬盡乃掠奪
民馬怨嗟驚擾行李殆絕請著定限以息其弊有
詔中書條檢定數由是吏得紓罪宦官共惡疾之
尋檢校戶部尚書山南東道節度使行部至鄧縣
吏有納賄舞文二人同繫獄縣令以公綽素持法
謂必殺貪者公綽判曰賊吏犯法法在姦吏壞法

法亡誅舞文者其廐馬害圉人公綽殺之或言良馬可愛曰安有良馬而害人乎京兆獄有姑鞭婦至死者府欲殺之公綽曰尊毆卑非鬪也且子在以妻而戮其母不順遂減論公綽嘗曰吾涖官未嘗以喜怒加於人子孫其昌乎

柳仲郢公綽子母韓善訓子故仲郢幼嗜學嘗和熊膽丸使夜咀嚙以助勤長工文著尚書二十四司箴爲韓愈咨賞元和末及進士第爲校書郎牛僧孺辟武昌幕府有父風矩矱儒嘆曰非積習名教安及此入遷侍御史有禁卒李秀才誣里人所父

墓柏射殺之吏以專殺論中尉獲免其死右補闕
蔣係爭不省仲郢監罰執曰賊不死是亂典刑有
詔御史蕭傑監之傑復爭遂獨詔京兆杖之不監
朝廷嘉其守會昌初遷左諫議大夫御史崔元藻
以覆按吳湘獄得罪仲郢切諫宰相李德裕不爲
嫌奏拜京兆尹置權量於東西市使貿易用禁私
製者北司吏入粟違約仲郢殺而尸之自是人無
敢犯政號嚴明中書舍人紇于衆訴甥劉詡毆其
母詡爲禁軍校仲郢不待奏卽捕取之死杖下宦
官以爲言一無所徇後出河南尹以寬惠爲政或

言不類京兆時答曰輦轂之下先彈壓郡邑之治
本惠養烏可類乎擢劔南東川節度使大吏邊章
簡挾勢肆貪前帥不能制仲郢因事殺之官下肅
然居五年召爲吏部侍郎俄改兵部領鹽鐵轉運
司有劉習者以藥石進詔署鹽官仲郢以爲醫有
本色官若委錢穀名分不正帝悟乃賜縑

李元素爲御史時東都留守杜亞惡大將令孤運會
盜劫輪絹於洛北運適與其下畧近郊亞疑而訊
之幕府按鞫無狀更以愛將武金掠服之詔監察
御史楊寧覆驗事皆不讐亞劾寧罔上寧抵罪傳

致周內之若不可翻者德宗信不疑詔元素與刑部員外郎崔從質大理司直盧士瞻馳按之悉縱所囚以還亞大驚復劾元素比還奏獄未畢帝怒曰第去元素曰臣以御史按獄知冤不得盡辭是無容復見卽道運冤狀帝感悟曰非卿孰能辨之然運猶以擅捕人得罪流歸州武金流建州後歲餘齊抗得真盜繇是天下重其名遷給事中

杜亞鎮維揚民有巨富者邸店童僕埒於王侯之家父亡未朞有繼親在奉之不以道元日上壽於母母復賜子旣受將飲乃疑有毒覆於地而地墳乃

詬母曰以鵠殺人上天何祐母拊膺曰天乎天乎
明鑒在上何當厚誣後詣公府亞詰之曰爾上母
壽觴何來曰長婦執爵母賜觴又從何來曰亦長
婦所執也長婦爲誰則此子之婦也亞訶之曰毒
因婦起奈何誣母遂分于廳側劾之則夫婦同謀
以誣其母云

韋臯鎮劔南往逆旅大賈有貨殖萬餘者舍店中每
因病行鵠旣卒所有財貨十隱七八因橫致富公
密知之有北客蘇廷家屬太鹵販蜀得病當夜而
卒以報公使驗簿已被店主易其文字乃究尋經

過密勘於里屬辭多異同遂劾司店者立承隱欺數千餘貫與諸吏分張二十餘人悉命付法由是劔南無橫死之客

竇參刑部尚書誕四世孫學律令爲人矜嚴悻直果於斷初爲奉先尉男子曹芬兄弟隸北軍醉暴其妹父救不止恚赴井死參當兄弟重辟衆請俟免喪參曰父由子死若以喪延是殺父不坐也卽日榜殺之

參字相明擢侍御史分司東都陝虢觀察使盧岳參分貲不及妻子妾訴之中丞盧侶欲重妾辜參

不聽召與宰相竇參誣以首金捕送獄弟賞上寃
狀詔三司覆治無之猶出爲郴州刺史參敗召爲
刑部郎中對延英擢御史中丞裴延齡判度支屬
吏受賕具獄欲曲貸吏贊執不可延齡白贊深文
得貶久之拜州刺史

竇參相無學術而貪每事與族子給事中申議申招
權納賄與諫議大夫吳通玄作謗書傾學士陸贄
二人以杖死參貶郴州而贄與趙憬並相會參受
玄武帥絹五千匹事覺帝大怒以爲外交有異志
贄曰參貪縱天下所知然以爲有異圖迹曖昧加

重辟駭動必多貶驩州司馬已命劾治其親黨贊
曰法罪有首從參爲罪首既見原他宜末減已又
欲籍其家贊曰法反逆者籍家賊汙者徵所犯皆
獄具乃論參罪法未著而籍之恐天下不厭事得
寢

同濟美鎮江南有舟人傭載商貨一人所載甚繁有
銀拾錠密隱貨中舟人潛窺之伺下岸乃盜沉於
所泊夜發至鎮點閱失其銀遂執舟者以見公公
曰客載之家盜物皆然也問客昨宿何所曰此百
里浦漢中公令武士與船夫同往索之公密謂武

士曰必是船人盜之沉於江中爾可令櫂師沉鈎物必在若獲受重賞乃依命而得之銀在篋中封署猶全舟者立承伏法

韋景駿爲貴鄉令有母子訟者景駿曰令少不天常自痛欲孝養無繇爾幸有親奈何忍忘孝邪因鳴咽流涕授孝經使習讀因感悟遂爲孝子

盧坦字保衡河南洛陽人仕爲河南尉時杜黃裳爲尹召坦立堂下曰某家子與惡人游破產盡察之坦曰凡居官廉雖大臣無厚蓄其能積財必剝下自潤者也子孫善守是天富不道之家不若恣其

不道以歸於人黃裳驚服李復爲鄭滑節度使表
爲判官監軍薛盈珍數干政坦每據理拒之有善
笛者諸將爲請職坦笑曰大將久在軍積勞亟遷
乃及右職奈何自薄欲與吹笛少年同列耶諸將
慙遽出就坦謝復病卒詔姚南仲來代之盈珍以
南仲本書生易之坦私謂人曰姚大夫外柔中剛
監軍好侵事必不聽我留必及於禍乃從復喪歸
東都爲壽安令盈珍果與南仲不相能幕府多黜
死者由是知名累遷侍御史知雜事赤縣尉爲臺
所按京兆尹密敕之帝遣中人就釋坦白中丞請

申復中人走以聞帝曰吾固宜先命有司遂下詔
乃釋數月遷中丞初諸道長吏罷還者取本道錢
爲進奉帝因敕令一切禁止而山南節度使柳晟
浙西觀察使閻濟美格詔輸獻坦劾奏待罪帝諭
坦曰二人所獻皆家財朕已許原不可失信坦曰
所以布大信者赦令也今二臣違詔陛下奈何以
小信失大信也帝曰朕旣受之奈何坦曰出歸有
司以明陛下之德其觀察宣歙時江淮旱穀踴貴
或請抑其價坦曰所部地狹穀來他州若直賤穀
不至矣不如任之旣而商以米至乃多貸兵食

出諸市價遂平再遷戶部侍郎判度支或告泗州刺史薛謩爲代北水運時蓄異馬不以獻事下度支坦遣吏驗未及帝遲之更遣中人劉泰昕往坦曰事付有司而又遣宦官豈有司不足信耶三奏帝乃止

王僕射播貞元十年舉進士第累官爲監察御史按雲陽丞源咸季以賊免用疑文不宜調而調因謁於臺遂捕劾之追姦窮律奏流咸季部省坐罪者甚衆自是風聲凜然時京兆尹李實文皇寵委能作禍福舉朝迎避其鋒公在途而實來揖公移文

詆之其詞可羞實遂奏公爲三原令求其不足於
禮以持之公至尹署禮無不具出實筭外加畏焉
縣編戶多中貴人前令率不能自爲政公悉召所
謂貴人者入坐堂上拜曰敬桑梓宜如是邑人大
駭從其所指爲長安令朝廷方恩于頤而以帝女
嫁其子民有與于氏蒼頭同盜人馬者前令捕民
而縱蒼頭公始至縣卽立取其奴而與民均法播
長於吏術剖析如流黠吏詆欺無不彰敗時天下
多故法寺議讞科條繁雜播備舉前後格條置之
座右凡有詳決疾速如神僚屬嘆服不暇

薛存誠字資明河中寶鼎人中進士第累遷給事中
瓊林庫廣籍工徒存誠曰此姦人羣名以避征役
耳神策軍與咸陽尉袁儋不平誣奏之儋被罰二
勅皆執不下憲宗悅遣使勞之拜御史中丞浮屠
鑒虛者自貞元中關通賂遺倚宦豎爲姦會坐于
頤杜黃裳家事逮捕下獄存誠窮劾之得贓數十
萬當以大辟權近於帝前解救有詔使詣臺諭曰
朕須此囚面詰存誠奏曰獄已具陛下必欲召赦
之請先殺臣乃可不然臣不敢奉詔鑒虛卒抵死
江西監軍高重昌妄劾信州刺史李位謀反追付

仗內詰狀存誠一日三表請付御史臺及按果無實未幾復爲給事中會御史中丞闕帝謂宰相曰持憲無易存誠者乃復命之

衢州人余長安父叔二人爲同郡方金所煞長安八歲自誓十七乃復讐大理斷死刺史元賜奏余氏一家遭橫死者實二平人蒙顯戮者乃一孝子引公羊傳父不受誅子得復讐之義時裴均爲宰相李邢部鄜爲有司事竟不行老儒薛伯高遺賜書大司寇是俗吏司刑人柄乃小生余氏子宜其死矣

許孟容字光範京兆長安人爲尚書右丞京兆尹神策軍自興元後日驕恣府縣不能制軍吏李昱貸富人錢捌百萬三歲不肯歸孟容遣吏捕詰與之期使償曰不如期且死一軍盡驚訴於朝憲宗詔以昱付軍治之再遣使皆不聽奏曰不奉詔臣當誅然臣職司輦轂當爲陛下抑豪強錢未盡輸昱不可得帝嘉其守正許之累遷兵部侍郎盜殺武元衡有詔金吾府縣大索或傳言曰無撻賊賊窮必亂又投書於道曰母急我我先殺汝故吏卒不窮捕孟容言於帝曰國相橫尸路隅而盜不獲爲

朝廷辱何以示天下帝乃下詔能得賊者賞錢千
萬授官五品官與賊謀及舍賊自首者亦賞有不
如詔族之積錢東西市以募告者於是左神策將
軍王士則左威衛將軍王士平以賊聞捕得張晏
等十八人言爲承宗所遣皆斬之又白宰相曰漢
有一汲黯姦臣寢謀今朝廷無過失而狂賊敢爾
尚謂國有人乎願白天子起裴中丞輔政使主兵
柄索賊黨罪人得矣後數日果相度

裴度進御史中丞宣徽五坊小使方秋閱鷹狗所過
撓官司厚得餉謝乃去下邳令裴寰才吏也不爲

禮因構寰出醜言送詔獄當大不恭度言寰無辜
帝怒曰寰誠無罪杖小使小使無罪且杖寰度曰
責若此固宜第寰爲令惜陛下百姓安可罪也乃
釋寰王鶚死家奴告鶚子稷易父奏冒遣獻帝留
奴伏內遣使者如東都按責其貲度諫曰自鶚死
數有獻今因告訐而檢省其私臣恐天下將帥聞
之有以家爲計者帝大悟殺二奴還使者大賈張
陟負五坊息錢亡命坊使楊朝汶收其家簿閱貸
錢根引數百人列筆挺脅不承又獲盧大夫坦通
券捕坦家客責償坦子上訴朝汶調語錢入禁中

不可得御史中丞蕭俛及諫官列陳中人橫恣度
極言之時方討鄆帝曰姑議東軍此細事我自處
辦度曰兵事不理止山東中人橫暴將亂都下帝
不悅徐乃悟讓朝汶曰以爾使我羞見宰相命殺
之而原繫者由是京師肅清李訓之禍凡宗婭賓
客悉收逮訊報苛慘度上疏申理全活數十姓武
德縣主藏吏盜錢亡命捕不得河陽節度使溫造
獄具令王賞責負繫三年母死弗許葬度曰此責
負非主盜也母死不許葬殆非孝治天下之義於
禮法不合矣由是賞乃得釋初公在潤州夜與韓

混登壽歲寢宴方酣置木不悅語云方日女惠婦人哭乎當近何所對曰在某橋某街詰旦命吏捕哭者乃婦喪夫也信宿獄不成吏懼罪守於屍側忽有大蠅集其首因開髮驗之果婦與隣人奸醉其夫而釘殺之吏以爲神因問公公曰吾察其哭聲疾而不悼若強而懼者不聞鄭子產有言乎夫人於其親也有病則憂臨死則懼旣死則哀今哭不衰而懼是以知姦也

韓滉字太沖前相文忠公休子也強直於吏事特精遷給事中知兵部選盜殺富平令獲之則北軍卒

也魚朝恩奏請貸浼執不可曰殺人抵死一切不可貸況令乎謂紀綱何遂誅

會昌中晉陽令狄惟謙梁公之後善爲政州境亢陽涉春夏數百里水泉耗竭禱於晉祠者數旬無應有女巫郭者攻符術狀勝之道有監軍携至京師因緣出入宮掖其後歸遂號天師天旣久不雨境內莫知所爲皆曰若得天師至晉祠則旱不足憂矣惟謙請於主帥曰災罹流行毗庶焦灼若非天師一救萬姓恐無聊生於是主帥親自爲請巫者許之惟謙幡蓋迎自私室躬爲控馬旣至祠所盛

設供張飲饌自旦及夕立於庭中如此者兩日語
惟謙曰爲爾飛符於上帝請雨三日雨當足矣觀
者雲集三夕雨不降又曰此土災沴亦由縣令無
德爲爾再請七日當有雨惟謙有罪於已奉之愈
恭及期又無應郭乃驟索馬入州陀惟謙曰天師
已爲百姓此來更乞祈禱勃然怒罵曰庸瑣官人
不知禮天時未肯下雨留我復奚爲惟謙謝曰明
日排比相送遲明郭將歸肴醴一無所設坐於堂
上大怒惟謙曰左道女子妖惑日久當須斃此焉
敢言歸叱左右曳於神堂前杖背三十投於潭水

祠後有山極高遂令設席焚香端笏立於其上闔
縣駭云長官打殺天師馳走者紛紜祠上忽有雲
如車蓋覆惟謙逡巡四合雷震數聲甘澤大澍數
尺於是士民自山頂擁惟謙而下州將初責以專
殺者旣而嘉其精誠有感與將軍表言其事制書
褒曰狄惟謙劇邑良才忠臣華胄覩此天厲將殫
下民當請禱于晉祠類投巫于鄴縣曝山極之畏
景事等焚軀起天際之油雲法同剪爪遂使旱風
潛息甘澤施流昊天猶鑒於克誠予志豈忘於褒
善特頒朱紱俾耀銅章勿替令名更昭殊績賜章

服并錢五十萬後歷絳縕二州刺史所治皆有名
稱

盧元公鈞鎮北都推官李璋幕中飲酒醉決主酒軍
職衙前虞候明日元公出赴行香其徒百八十人
橫街見公論無小推巡決得衙前虞候例元公命
收禁責狀至衙命李推官所決者更決配外鎮其
餘虞候各罰金內外不測璋惶恐衣公服求見公
問何事公服請十郎袴衫麻鞋相見璋欲引咎公
語皆不及臨去曰十郎不決衙前虞候只決所由
假使錯誤亦不可縱況太原邊鎮無故二百虞候

橫欄節度使須當桂之璋後爲尚書左丞

源乾曜爲京兆尹留守京師治尚寬簡人安之居三年政如始至仗內白鷹因縱失之詔京兆督捕獲於野絰榛死吏懼得罪乾曜曰上神明不以畜玩寘罪苟其獲戾尹專之遂入自劾失職帝一不問衆服其知體而善引咎

李絳出爲華州刺史承瓘田多在部中主奴擾民絳捕繫之會遣五坊使帝戒曰至華宜自戢絳大臣有奏卽行法矣州有捕鵠戶歲責貢限絳以爲言併勸止畋獵有詔澤潞太原天威府并罷之蒲城

民李蘊訴人盜其從子亡去絳問曰若有仇耶曰
無有曰有失亡耶曰無有絳揮蘊去因密刺蘊蘊
有陰罪姪覺之懼事暴殺之以滅口遂收蘊致法
崔羣爲中書門下平章事李師道誅憲宗顧謂宰臣
曰李師古雖自襲祖父然朝廷待之始終其妻於
師道卽嫂叔也雖云逆族若量罪輕重亦宜降等
又李宗奭雖抵嚴憲其情比之大逆亦有不同其
妻士族也今其子女俱在掖廷於法皆似稍深卿
等留意否羣對曰聖情仁惻罪止元兇其妻近屬
儻或寬宥實合弘煦之道於是師古妻裴氏女宜

娘詔出於鄧州安置宗奭妻韋氏及男女先沒掖
廷並釋放其奴婢資貨皆復賜之又監鐵福建院
官權長孺坐賊詔付京兆府決殺長孺母劉氏求
哀於宰相羣因入對言之憲宗愍其母耄年乃曰
朕將屈法赦長孺何如羣曰陛下仁惻則赦之當
速令中使宣諭如待正勅卽無及也長孺竟得免
死長流羣之啓奏平恕多此類也

孔戣冀州人孔子三十八世孫舉進士方正守節累
遷給事中江西觀察使李少和坐賊罪獄寢不下
博陵崔易簡殺從父兄鞠狀具京兆尹出之戣奏

劾貶少和殺易簡奪尹三月俸當是時戮高步公卿間侃然忠讜有諫臣之體再遷尚書左丞信州刺史李位好黃老數祠禱監軍以州將上變告言位聚妖術謀爲亂捕劾治禁中郊奏刺史有罪法當歸法司不當於伏內鞠劾請送御史臺與三司雜治詔聽之位以無他逆狀免南海淡菜蚶蛤有歲貢郊以爲自海抵京師道遠水陸煩費歲積工至四十三萬人奏罷之會嶺南帥闕帝謂相度曰嚮論罷南海進蚶菜者爲誰今安在度曰祭酒戮也卽拜御史大夫嶺南節度使旣至免屬州逋負

十八萬緡米八萬斛黃金稅歲八百兩嶺南守宰俸故薄又不以時給取諸部中吏得籍爲貪鄙乃倍其俸而分外取索者繩以法由是吏皆自重境內晏然無犯法者敬宗立召爲吏侍郎轉尚書左丞疏請老韓愈高其節云

錢徽爲江州刺史初州有盜劫貢船捕吏取濱江惡少年二百人繫訊徽按其枉悉縱去數日得真盜於舒州州有牛田錢百萬刺史以給宴飲贈餉者徽曰此農耕之備可他用哉命代貧民租入轉湖州時宣歙早左丞孔戣請徙徽嶺宣歙宰相不用

卷一百一十五
三十七
鄧曰相君宜知天下事微江號之治不及知況其
他邪還遷工部侍郎

李渤洛陽人篤志於學與仲兄涉偕隱廬山嘗以爲
列禦寇拒粟而妻怒爲無婦樂羊子受金而妻讓
爲無夫乃撫古聯德高蹈者楚接輿老萊子黔婁
先生於陵仲子王仲孺梁鴻六人圖其象讚之以
自儆久之徙少室隱焉元和初用戶侍郎李巽諫
議大夫韋況薦以右拾遺召不拜後得韓愈書以
著作郎召就官累擢給事中五坊卒夜毆縣人而
傷郭令崔發勅吏捕梓之其一中人也帝大怒收

發送御史獄會大赦改元發以囚坐金雞下待宣赦中人數十持挺亂擊發敗面折齒幾死既囚皆釋而發獨不原渤上疏曰縣令搜辱中人中人欺毆御囚其罪鈞然令罪在赦前中人罪在赦後請寘于理帝謂渤爲黨出爲桂觀察使渤以古道自持不苟合於世世咸目其矯激渤不爲變

薛元賞爲京兆尹都市惡少以黨墨鏡虜夸詭刀爲剽寇坊間苦之元賞至府三日收杖死者三十輩陳諸市餘黨懼爭以火滅其文常詣相李石第石方坐廳事與一人爭辨甚謹元賞使尉覘之云神

策卒訴事也元賞趨入責石曰相公紀綱四海不能制一軍卒使無禮如此何以鎮四夷乎命左右擒卒出効之諫走告關士良士良命召之元賞曰屬有公事行當至矣乃杖殺之而白服以詣士良曰中尉宰相皆大臣也宰相之人若無禮於中尉死可也中尉之人無禮於宰相當何如中尉與國一體當爲國惜法元賞已囚服來惟中尉之所死生之士良不能難呼酒與飲歡而罷由是軍卒折戢百姓以安

李石用兵部員外郎韓益判度支案益坐贓繫臺石

奏曰臣以韓益饒錢穀錄用之不期貪猥如此帝
曰宰相但知人則用有過則懲卿所用人且不掩
其惡可謂至公矣

王彥威爲諫議大夫與平民上官興殺人亡命吏囚
其父下獄興聞自首請罪京兆尹杜棕御史中丞
宇文鼎以自歸死免父之囚可勸風俗議減死彥
威上言殺人者死百王共守原而不殺是教殺人
也有詔貸死彥威詣宰相據法爭論

鄭光宣宗之舅別墅吏頗恣橫爲里中患積歲征租
不入戶部侍郎韋渙爲京兆尹擒而械繫之及延

英對上曰卿禁鄭光莊吏何罪澳具奏之上曰卿擬如何處置澳曰臣欲寘於法上曰鄭光甚惜如何澳曰陛下自內庭用臣爲京兆尹使臣理畿甸積弊若鄭光莊吏積年爲蠹得寬重典則是朝廷之法獨行於貧下臣未敢奉詔上曰誠如此但鄭光再三于朕卿與貸法得否不然重決貸死可否澳曰臣不敢不奉詔但許臣具繫之俟徵積年稅物畢放出亦可爲懲戒上曰可也爲鄭光所稅擾卿行法自近澳自延英出徑入府杖之徵欠租數百斛乃縱去

禮部尚書初治虢以寬經月不答一人及涇鄂則嚴法峻誅一不貸或問其故曰陝土瘠而民勞吾撫之不暇猶恐其擾鄂土沃民剝雜以夷俗非用威莫能治政所以貴知變者也聞者服焉

樂工羅程者善彈琵琶爲第一能變易新聲得幸於武宗恃恩自恣宣宗初亦召供奉程旣審上曉音律尤自尅苦往往令侍嬪御歌必爲奇巧嚴動上由是得幸程一日果以睚眦殺人上大怒立命斥出付京兆他工輩以程藝天下無雙欲以動上意會幸苑中樂將作遂旁設一虛座寘琵琶於其上

樂工等羅列上前連拜且泣上曰汝輩何爲也進
曰羅程負陛下萬死不赦然臣輩惜程藝天下第
一不得未奉陛下以是爲恨上曰汝輩所惜者羅
程藝耳我所重者高祖太宗法也卒不赦程

穆宗世京兆人康買得年十四父憲責錢於雲陽張
蒞蒞醉拉憲危死買得以蒞驕悍度救不足解則
舉槓擊其首三日蒞死刑部侍郎孫革建言買得
救父難不爲暴度不解而擊不爲凶先生制則必
先父子之親春秋原心定臯周書諸法有權買得
孝性天至宜賜矜宥有詔減死

李景讓字後已贈太尉愷孫也性方毅有守母鄭治
家嚴身訓勅諸子始貧乏時治墻得積錢僮婢奔
告母曰士不勤而祿猶蓄其身况無妄而得乎亟
使閉坎景讓自右散騎常侍出爲浙江觀察使母
問行日景讓率爾對有日鄭曰如是吾方有事未
能行蓋怒其未嘗告也且曰已貴何庸母行景讓
重請罪乃赦已起欣欣如初嘗怒牙將杖殺之軍
且謀變母欲息衆謹召景讓廷責曰爾鎮撫方面
而輕用刑一夫不寧豈特上負天子亦使百歲母
銜羞泉下何面目見先大夫乎將鞭其背吏大將

再拜請不許皆泣謝乃罷一軍遂定

劉栖楚爲京兆尹峻刑罰不避權豪先是諸惡少竄名北軍凌籍衣冠有罪則逃軍中無敢問栖楚一切窮治不閱旬宿姦爲之斂迹一日軍士乘醉有所凌突諸少年從旁譟曰癡男子尚敢近衣冠不記頭上尹耶與屬吏言不傷氣未嘗叱一官人嘗謂府縣官曰諸公各自了本分公事晴天美景恣意遊賞勿致拘束

張仲方九齡之孫也刺史金州宦人奪民田仲方三疏伸理卒與民直敬宗立爲諫議大夫鄆令崔崇

以辱小黃門繫獄逢赦不見宥仲方上疏其畧曰
鴻恩布海內而不行御前霈澤被昆蟲而獨遺邑
令由是發得不死時論美之太和九年爲京兆尹
將相從賊者皆大戮仲方密令識之旋詔下許令
收葬得認遺骸實仲方之力也

崔碣爲河南尹邑有大賈王可久轉貨江湖間值龐
勛亂不得歸妻請卜者楊乾夫咨存亡乾夫名善
數而內悅妻色又利其富旣占陽驚曰乃夫殆不
還矣久之陰以百金謀媒者誘聘之得妻遂爲富
人徐州平可久困而歸里往見妻乾夫詎逐之妻

諸吏自言不得直坐罪可久於是恨嘆失明碣之
來可久陳寃一訊而決卽勅吏掩乾夫并前獄吏
下獄悉發賕姦一日殺之以妻還可久時淫潦獄
決而霽都民相語歌舞於道

卽餘令爲幽州錄事叅軍有浮屠者積薪自焚長史
裴照率官屬將觀焉餘令曰人好生惡死情也彼
違茂教義反其所欲公當察之母輕往照試廉按
果得其姦

杜中立爲金吾大將軍京師惡少優戲道中具騷唱
虛言京兆驅放自如中立從吏捕繫箠殺之遷司

農卿入謝帝曰卿用法深信乎答曰轂下百司養
名不肯事事如司農尤叢劇陛下無遽信流言假
臣數月事可濟也

蕭邁當國風采峭整天子器之時藩鎮多興於盜賊
橫放莫能制支詳在徐州引散騎常侍李損子凝
吉爲佐會牙將時溥逐詳而取節度溥爲饗幹所
毒不死或讒凝吉爲詳報仇者溥怒殺之上言損
連謀請并誅田令孜受溥金劾損付御史獄中丞
盧渥傳成其罪御史王華表損不知狀令孜請移
神策獄華不奉詔奏言損近臣法不當死卽死獨

不宜取辱於宦人手遽卽時叩延英爭曰凝吉以
冤就屠已不可言損與子音問不接數年安得謂
同謀哉溥恃功壞天子法請案近臣卑侮王室有
無將之萌臣等寒心帝寤猶免損官

韋丹爲江南西道觀察使有吏主倉者十年覆其糧
亡三千斛籍其家得文記知權吏所奪也召諸吏
謂曰若恃權取於倉倉失亡多罪在若與若期一
月還之不者坐皆頓首謝及期所亡粟畢償有卒
遽令畢當死亡詣闕上書告丹畢詔解官待質會
丹卒御史大夫率所告皆不實而治狀愈明太和中

宣宗問元和時治民吏誰最賢者相墀曰臣守江西時知韋丹功德被入州沒四十年民誦思不忘最賢也

李德裕鎮浙西甘露寺主僧訴交割常住物被主事僧隱沒金若干兩引前數輩爲證遞相交付文籍在焉新代者已服盜取之罪未窮破用之所公疑其未盡也僧乃訴曰居寺者樂於知事積年來空文交代其實無金矣衆人以某孤立不狎流輩欲乘此擠之因流泣不勝其冤德裕惻然曰此固非難也乃立促召堯子數乘關衆僧入坐其中面壁

不得相見各以黃泥令模前後金形以憑證據而皆不同所排者遂獲清雪

中尉王守澄用鄭注計度文宗所心忌者漳王滸漳王帝弟也賢而有人望遣軍候誣告宋申錫陰謀立漳王帝方浴守澄故持章走浴室扣戶入奏之語驟甚帝怒命遣神策士二百立屠申錫家飛龍使馬存亮叩頭爭曰謀反者獨申錫奈何不當令南司議乎不且變矣守澄嗒然馳召相僧孺等入出告牒示之皆駭愕不知所對而守澄立捕所告品官置獄禁中議抵死左散騎常侍崔玄亮率諫

官十四人詣延英泣曰孟軻有言左右皆曰可殺勿聽卿大夫皆曰可殺勿聽國人皆曰可殺然後察之寘於法殺一匹夫猶重慎如此況於宰相獨以左右一人告殺之乎給事中李固言諫議大夫王質補闕韋溫盧鈞等力請以獄付外廷覆按僧孺曰覆按甚善人臣願不過宰相申錫旣相矣卽立王何求請下覆按注恐覆按得詐乃勸守澄請貶黜無按於是漳王降巢縣公流申錫開州

李中敏爲司門員外郎太和六年早上言雨不時降夏陽驕愆苗欲槁枯陛下憂勤降德音求直言臣

聞昔東海誤殺一孝婦大旱三年臣頃爲御史臺
推囚革封儒殺良家子三人臣不知何以得赦夫
三人者亦陛下赤子也神策士李秀殺平民法當
死以禁衛而流宋申錫位宰相生平饋致一不受
守道勁正姦人忌之陷不測之辜獄不叅驗銜恨
而沒天下士皆指曰鄭注臣知數寃必列訴上帝
天之降災殆有由然陛下何惜斬一注以快忠臣
之寃則天且雨矣

咸通初有天水趙和者爲江陰令以片言折獄著聲
累宰劇邑皆以雪寃獲慶考至於疑似晦偽之事

能以情理之楚淮陰二農比庄其東隣則拓腴田數百畝資強未滿以庄券質於西隣貸緡百萬約來歲贖至期果以腴田獲利備錢往先納其半未取契書明日賣餘緡至遂爲西隣不認又無保證簿籍終爲所拒東隣以冤訟於縣宰謂曰誠疑爾冤其如契券無證何術理之復訴之州州不能理乃越江而訴於趙曰縣政甚卑踰境何能理也東隣冤泣曰至此不復得理無由自滌矣和曰第止署內試爲爾思之經宿召曰計就矣爾果不妄否則曰焉敢厚誣和曰誠如是則當爲寘法乃召捕

賊之幹者數輩賫牒至淮陰曰有寇江者按劾其具言其與在某處姓名形狀具以西隣指之先是鄰州條法唯持刀截江無得藏匿者追至則跪於庭下和厲聲謂曰幸耕織自活何爲寇江囚泫然淚墮曰稼穡之夫未嘗舟楫和又曰辯證甚具姓氏無差或言僞而堅櫓血膚取實囚叩頭見血如不勝其冤者和又曰所盜索金寶綿絲非農家所宜蓄者汝宜籍舍人產以辨之囚意稍開乃言稱若干斛庄人某人還者納絹若干疋家機所出者錢若干貫東隣贖契者銀器若干件匠某造成者

趙大喜卽再審其事謂曰非汝寇江者何諱東隣
贖契百千縉遂引訴隣令其偶証於是慙懼失色
祈死廳下趙令枯往其宅檢付契書然後寘之法
矣

何易于史不詳何所人爲邑昌令鹽鐵官權茶利詔
所在毋敢欺易于視詔書曰益昌人不征茶已瘠
不可活尚忍苦之乎聞不行觀察使賢之不効也
民有死喪業破不能葬者輒出俸勑吏爲營辦民
以事詣縣有垂白僂杖而來者必召坐與食飲問
政得失凡訟民在庭易于丁寧曉譬枉直薄懲而

遣之不以屬吏獄三年無囚

劉崇龜鎮南海有富商子泊船江岸見一高門有美姬殊不避人因戲語之曰夜當詣宅矣亦無難色啓扉待之忽有盜入其室姬卽欣然往就盜謂見擒以刀刺之逃去富商子繼至踐血而仆聞脰血聲覺有人卧地徑走出舫夜解維遁其家蹤跡訟於官府遣人追捕械繫考訊具吐情實惟不招殺人崇龜視所遺刀乃屠刀也因下令曰某日大設闔境屠夫皆集球場以俟宰殺旣而晚放散令各留刀翌日再至乃命以殺人刀換下一口明日諸

人各認本刀一人不去云非某刀問是誰者云某人刀亟往捕之則已竄矣於是以他囚合死者爲商人子侵夜斃之竄者聞而還乃擒寘於法富商子坐夜入人家杖背而已

裴均鎮襄日民有妻外向者乃託病云醫者所傳是骨蒸之疾不易差差食臘犬謂其夫曰君能致一犬爲妾食之死亦無恨夫曰吾家無犬何所得乎妻曰東隣有犬每來盜物此可屠耳夫如其言獻於妻妻食之留其餘篋笥中鄰得以告官公云盜犬而殺國有常刑鞠之立承具述妻之所欲也母

乃妻有他姦躋夫於法乎劾得其情乃處妻及外情者

懷州河內縣董行成能察賊有一人從河陽長店盜驢一頭并囊袋天欲曉至懷州行成見叱之曰彼賊住賊下驢卽承伏問何以知之行成曰此驢行急而汗非長行人也見人則引驢遠過怯也以此知之收下獄有頃驢主尋蹤而至果如其言

張鷟字文成爲河陽尉有人言呂元者詐作倉督馮忱書盜糶倉米忱不認書元乃堅執不能斷鷟取元告狀用紙貼兩頭唯留二字問是汝書卽註云

是不是卽註云非元乃註曰非乃去貼卽是元狀
先決五十又貼詐爲馮忱書留二字以問之註曰
是去貼乃詐書也元於是叩頭伏罪又有一客驢
韁斷并鞍失之三日尋不獲詣縣告驚推勘急賊
乃夜放驢出而藏其鞍可直五千文驚曰此易知
也遂不令秣飼去轡放之驢尋向餵處乃令搜索
其家鞍於草積下得之人服其罪

莊遵爲揚州刺史性明察陽陵女子與人殺其夫叔
覺來赴賊女子卽以血塗叔因大呼曰奈何欲私
我而殺其兄卽便告官官司不能理坐叔罪遵察

之乃謂吏曰叔爲大逆速寘於法可放嫂歸密令人夜中於嫂壁下聽之其夜姦者果來問曰刺史明察見叔寧疑之耶嫂曰不疑因相與大喜吏卽擒之送獄叔獲免巡行部內忽聞哭聲懼而不哀駐車問之答曰夫遭火燒死遵疑焉因令吏守之有繩集屍首披髻視之得鐵釘焉卽按之乃伏其罪

崔黯鎮河南有惡少不爲鄉里所容乃自髡鉗衣佛教假托焚修幻誘愚俗積財萬計公初到懼事露乃投牒請脫鉗俗公問曰爾教化三年所得幾何

曰旋得旋用人曰費用造設幾何曰三十餘貫公
曰給者既知納者不記決有隱欺乃搜其積蓄有
妻子滿室遂劾其矯妄之罪以財物施貧下

衛州新鄉縣令斐子雲有奇策部人王恭戍邊留犒
牛六頭於舅李璉養五年產犢三十頭例直十千
已上恭還索舅曰汝牛已瘦死姑還四頭以恤遠
歸之苦恭忿之訴於子雲子雲令送恭獄禁令收
追盜牛賊李璉惶怖至縣子雲叱之曰賊引汝同
盜牛三十頭藏庄內喚汝共對乃以布衫蒙恭頭
立南墻下璉急吐款云牛三十頭總是我外甥犒

牛所生實非盜得子雲遣去恭布衫璫驚曰此是外甥也子雲曰若是卽當還牛更欲何語璫默然子雲曰五年養牛辛苦與牛五頭餘並還恭一縣伏其明察

張松壽任長安縣令時昆明池側有劫賊奉勅下十日內須獲違限罪之松壽至行劫處檢蹤見一老姥樹下賣食往以從騎馱來入縣供酒食經五日還送舊坐處令一腹心人潛伺之有人共老姥語卽捉來果有一人來問明府若何推勘卽捉以布衫蒙頭送縣問具伏與賊並獲時人以爲神

後唐同光年故滄帥孔相循以邦計二職權涖夷門
軍府事長坦四巨盜饒財產及敗所牽挽四人則
貧民其時都虞候姓韓者以樞密郭崇韜之寮壻
也與權吏暨獄典等同鍛成其款以四貧民代盜
款成而上孔公斷令棄市皆不吐一言既出門輒
聲冤不肯行公復召問曰果枉適何不言曰適引
問之時獄吏高其枷尾欲言不得也請去左右細
述其事公曰得非虛否對曰某則已死之人豈徒
延瞬息之生耶卽令移於州獄俾郡主簿鞠之自
韓已下凡受賂近數十人計贓約七千緡則并校

而推之韓卽使人馳告崇韜移書於公不諾卽具
伏法四人獲雪用畫像以答孔公之德

梁袁君正爲豫章內史俗信巫郡有萬世榮爲巫師
君正小疾主簿熊岳薦之師云須疾者衣爲信命
君正以所著襦與之事訖取襦去神將送君君正
使檢諸身於衣裏獲之以爲亂政卽刑於市一郡
無敢行巫者

南唐昇元格盜物及五緡者死廬陵豪民曝衣失新
潔衾服直數十千村落僻遠人罕經行以爲其鄰
盜之鄰人不勝楚掠而服詰其贓物則云散鬻於

市無從追究也赴法之日寃聲動天長吏以聞先
主命員外郎蕭儼覆之儼齋戒禱神興雪寃枉至
郡之日天氣晴和忽有雷聲自西北起至失物家
震死一牛剖其腹而得所失物乃是爲牛所噉猶
未消潰也

後漢薛居正署開封府判官時史弘肇領侍衛親軍
威權震主無敢忤其意者其部下吏告民犯鹽禁
法當死將決居正疑不實召詰之乃吏以私憾民
誣致之死也一鞠具服遂抵法弘肇不能屈迨宋
初知朗州會亡卒數千人聚山澤爲盜監軍使疑

城中僧千餘人皆其黨議欲盡捕誅之居正以計
緩其事因索衆剪滅羣寇擒其帥汪端詰之曰汝
所共爲謀未發者幾何人哉悉出其名吾且貸汝
矣語不及僧賴以全活其始終執法如此勲業爛
然配享太祖廟庭斯其槩云

盧億以水部員外郎充開封府推官時侍衛諸軍驕
朝廷姑息之軍士成美以驢負鹽入都門鬪者不
敢執反擒平民孟柔送侍衛司柔自誣伏論當棄
市億察其冤言於漢祖而釋之

後周

柳慶初仕後魏爲雍州別駕廣陵王元欣魏之懿親也其甥孟氏屢爲凶橫有告其盜牛者捕推得實殊無懼容乃謂慶曰今若加以桎梏後復何以脫之欣代爲申辨孟氏益驕慶乃大集僚吏盛言孟氏依倚權威暴虐之狀令笞殺之此後貴戚歛手有賈人持金二十斤詣京師交易寄人停止每欲出行常自執管鑰無何緘閉不異而失之謂是主人所竊詣縣訊問慶聞而嘆之乃召問賈人曰卿鑰常置何處對曰常自帶之慶曰頗與人同宿乎曰無曰人同飲乎曰向者曾與一沙門再度酣宴

醉而晝寢慶曰主人特以痛自誣非盜也彼沙門
乃真盜耳卽遣吏隸捕沙門乃懷金逃匿後捕得
盡獲所失之金又有胡翊家被劫郡縣按察莫知
賊所隣近被囚繫者甚多慶以賊徒旣重似是烏
合旣非舊交必相疑阻可以詐求之乃匿名書多
榜官門曰我等共劫胡家徒侶混雜終恐泄露今
欲首懼不免誅若聽先首免罪便欲來告慶乃復
施免罪之榜居二日廣陽王欣家奴面縛自告榜
下因此推窮盡獲黨與慶之守正明察皆此類也
每歎曰昔于公斷獄無私闢高門可以待封儻斯

言有驗吾其庶幾乎

劇可久爲大理卿會鄭州民李思美妻詣御史臺訴夫私鬻鹽罪不至死判官楊瑛寘以大辟有司攝治瑛瑛具服可久斷瑛失入減三等徒二年半宰相王峻欲殺瑛召可久謂之曰死者不可復生瑛枉殺人其可恕耶可久執議益堅瑛得免死由是忤峻改太僕卿分司西京未幾復拜大理可久在廷尉四十年用法平允以仁恕稱

邊珣掌永安軍時揚州有富民訴廣陵尉謝圖殺其父本部收尉囚之官吏推劾累二百日獄未具州

以狀聞詔珣案鞫盡得其實乃富民用私憾誣尉
反坐之一郡以爲神鑒云

楊津爲岐州刺史有武功人齊絹三百匹去城十里
賊劫去時有使者馳騎而至被劫人告之使者以
狀白於州津乃下詔曰有人着某色衣乘某色馬
在城東十里被殺若有家人可速來告有一老母
行哭而至云是已子於是收捕并絹俱獲

周世宗在漢爲諸衛將軍嘗遊畿甸謁縣令忘其姓
名令方聚邑蒲博弗得見世宗頗銜之及卽位令
囚部夫犯賊數百疋宰相范質以具獄上奏世宗

曰親民之官賊狀狼籍法當處死質奏曰受所賂
臨財物有罪止賊雖多法不至死世宗怒厲聲曰
法者自古帝王之所制本以防姦朕立法殺一賊
吏非酷刑也質曰陛下殺之卽可若付有司臣不
敢署勅遂貸其命因令今後犯者並以枉法論質
乃奉詔令刑統中強率歛入已並同枉法者是也
質之守正不回大率如是

魏丕初從周世宗鎮澶淵奏授司法叅軍時有強盜
五人獄具將伏法丕疑其冤因緩刑而察之數日
本盜就擒五人獲免後事宋終於左驍衛將軍焉

高防初爲防禦使張從恩判官有親校段洪進者盜官木造器市取其直從恩怒將殺之洪進計無脫僞曰此判官使我也防不辨洪進得免從恩遺防錢十千馬一匹遣之行旣而悔之命騎追防還賓主如初歲餘稍稍有言防自誣以活人者從恩益加禮重乾佑初除刑部郎中宿州民以刃殺妻妻族受賂爲言風狂病瘖吏引律不加考掠具獄上請大理斷今決杖防覆之云其人風不能言無醫驗狀以何爲証况禁繫踰旬獨能不索飲食邪再劾果得其情其在蔡州日部民王乂爲賊所劫捕

得其黨五人繫獄窮理賊仗已具錄事叅軍司徒達判官盧紘據案請加極典防疑其不實取賊閱之因召王又問曰爾家所失衫袴是一端布邪又曰然防令校其幅尺皆廣狹不同又疎密差異賊乃稱冤防曰何故伏罪賊曰不任筆楚蓋自誣以求速死耳居數日獲其本賊紘達叩頭請罪防皆不奏得活者欲詣闕訟防之功訴紘達之罪防遽令止更爲製衫帽具酒食諭而遣之防後事宋終於尚書左丞

馬仁瑀以邊功遷瀛州防禦使兄子嘗因醉誤殺平

民繫獄當死民家自言非有宿憾但過誤爾願以
過失殺傷論仁瑀曰我爲長史而兄子殺人此怙
勢非過也豈敢以私親亂國法哉論如律給民家
布帛爲棺殮具

杜鎬幼好學博貫經史兄爲法官嘗有子毀父畫像
爲旁親所訟疑其法不能決鎬曰僧道毀天尊佛
像可比也兄甚竒之宋興爲崇文院檢討歷工部
侍郎朝廷每故事有疑輒訪焉

韓褒爲北雍州刺史加衛大將軍州帶北山多有賊
盜褒密訪之並豪右所爲也而陽示不知厚加禮

遇謂之曰刺史起自書生安知督盜所賴卿等共
分其憂耳乃悉召桀黠少年素爲鄉里患者署爲
主帥分其地界有盜發而不獲者以故縱論於是
諸被署者莫不惶懼皆首伏曰前盜發者並某等
爲之所有從侶皆列其姓名或亡命隱匿者亦悉
言其所在袞乃取盜名簿藏之因大榜州門曰自
知行盜者可急來首卽除其罪盡今月不首者顯
戮其身籍沒妻子以賞前首者旬日之間諸盜咸
悉首盡袞取名簿無差異並原其罪許以自新由
是羣盜屏息

敬止錄

卷之六

五

敬止錄卷之六終